



ANG

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Bayan

Edisyong Bisaya
Bolyum LVI Ihap 11
Hunyo 7, 2025
www.philippinerevolution.nu

EDITORIAL

Pakusgon ang mga pakigbisog batok sa paantus ug traydor nga rehimeng Marcos

Padayon nga nagkalalum ug nagkagrabang ang pag-antus sa katawhang Pilipino tungod sa mga programa ug palisiya sa rehimeng Marcos nga kontra-kabus, kontra-katawhan ug pabor sa dagkung langyawng kapitalista ug mga lokal nilang ahente, mga agalong yutaan ug burukrata-kapitalista.

Nagpakatagbaw ang pamilyang Marcos, mga kroni ug alipures sa pondo ug pribilehiyo sa gubyerno, samtang mius-us ang panginabuhin sa mayorya ng mga Pilipino. Daw kabaw sa grabeng pagpaningkamot ang mga mamumuo ug masang anakpawis. Kulang kaayo ang sahilan ug sweldo atubangan sa padayon nga pagsaka sa presyo ug singil sa serbisyo. Milyun-milyon ang walay trabaho. Mumho ang kita ug moagi lamang sa palad sa masang nag-antus. Nagkadaghan ang napugos maghimo og iligal aron lamang adunay mapakaon sa ilang mga anak.

Hilabihan ang kasilag sa katawhan sa rehimeng Marcos sa kawalay pagtagad niini sa masang nag-ilaid sa kalisud, ug sa pagpasamot niini sa krisis sa panginabuhian ug pag-antus sa katawhan.

Nagpabungulbungol si Marcos sa lapad nga mga panawagan sa katawhan. Ginabalewala niya ang singgit sa lapad nga masa alang sa makabuhing suhulan ug sweldo, trabaho, tinuod nga reporma sa yuta, katungod sa katubigan, pagpaku sa badyet alang sa libreng katilingbanong serbisyo ug aron palapdon ang lokal nga produksyon, ug uban pang hinanaling pangayo.

Hinunua, nagpuliki si Marcos sa mga gimik nga walay kapuslanan sa katawhan, sama sa dakung drama sa pagbalasa sa gabinete (nga tulo lang ang gipulihan), pagpanghinambog sa ₱20 kada kilo sa bugas (gawas nga pipila lamang ang nakabenebisyo, kadyot ra pud kaayo), libreng sakay sa LRT

(nga upat ka adlaw lang) ug bisan unsa pang haw-ang nga mga pakulo. Aron linglahon ang katawhan, nagpagula si Marcos ug mga upisyal niya og mga estadistika aron tabunan ang padayon nga paggrabe sa krisis sa ekonomiya, pagtaas sa presyo sa mga palaliton, ug labawng pag-antus sa milyun-milyong Pilipino sa kalisud.

Grabe ang pagyatak sa rehimeng Marcos sa katungod ug panginabuhin sa masang anakpawis. Aron agnihon ang mga langyawng kapitalistang tigpamuhunan, ginahansang ni Marcos ang suhulan sa mga mamumuo aron pahimuslan ang ilang baratong kusog-pamuo. Sa kabanikanhan, ginagamit ni Marcos ang pasistang militar aron hatagag-dalan ang malukpanong pagpangawhaw sa yuta alang sa mga plantasyon ug minahan, nga nagpalayas sa gatusan ka libong mag-uuma ug mga minor-

yang katawhan sa ilang yuta. Ginailugan og panginabuhian ang mangingisda, mga drayber sa dyip, ug uban pang mga kabus nga nanginginabuhin. Sa ngalan sa pagdaginot, plano ni Marcos nga kibhangan ang empleyado sa gubyerno nga labawng magpagrabe sa pangpublikong serbisyo.

Paantus na gani sa katawhan, padaton pang ginabutang ni Marcos sa alaot ang siguridad sa nasud, tungod sa buta niyang pagsunod-



sunod sa mga dikta sa iyang amo nga imperyalistang US. Nagpagamit si Marcos sa Indo-Pacific Strategy sa US aron liyukan ug pugngan ang pagkusog sa China. Nagkadaghan ang mga base militar ug pasilidad sa US sa Pilipinas aron magbubo og libuan ka tropang Amerikano sa lain-laing bahin sa nasud. Ginaguyod ni Marcos ang Pilipinas sa gubat nga gustong paulbuhon sa US, sa walay gintang nga paglunsad og mga pagbansay ug pagpangandam og gubat, ug paghan-ok sa nagkadaghang kusog nga himang iggugubat sa US nga gination ngadto sa karibal niining China.

Tungod sa pagpaantus ug pagluib sa katawhan, labaw nga nahimulag ang nagharing rehimen sa katawhang Pilipino. Giwarawara ni Marcos ang Memorandum Circular No 83 aron hingpit nga isabwag ang pasistang kabangis aron sumpuon ang pagsukol sa katawhan. Apan dili mapugngan ni Marcos ang pagabante sa militanteng kalihukang masa tungod kay anaa sa likod niini ang katawhang determinadong tapuson ang kagutom ug kaulipnan.

Ginakonsolida ni Marcos ang iyang poder sa pagtuboy sa kapin 200 ka heneral sa AFP ug pagtudlo sa mga bag-ong upisyal sa mga

kumpanyang gunit sa gubyrno, samtang ginayugyog kini sa pulitikanhong krisis atubangan sa nagpa-dayon ug nagkagrabeng bangi sa mga magkaaway nga paksyon.

Sa tinguhang ipabilin sa poder ang ilang pamilya, gusto ni Marcos nga hingpit nga pukanon ang mga Duterte aron pugngan ang plano sa iyang karibal nga makabalik sa poder sa 2028. Apan daw giduladulan niya ang katawhan sa paghatag-bawi sa iyang mga alipures sa Senado sa pagtaral sa kasong *impeachment* batok kang Vice President Sara Duterte, timaan sa pagkig-areglohay sa mga dunot nga reaksyunaryong paksyon. Paspas nga mikuyanap ang kalayo sa kasuko sa katawhan sa mga pagsulay nga pugngan ang pagtaral ug pagpanubag kang Sara Duterte sa pagwaldaw sa kwarta sa katawhan ug uban pang bug-at nga salaod.

Walay ihatag nga alibyu ang burukrata-kapitalista, pasista ug papet nga rehimeng Marcos sa kinabuhi sa katawhang Pilipino. Taliwala sa nagkagrabeng krisis, walay laing kapilian ang masang kabus ug pinihig kundili ang makigbisog. Ginatukmod sa sitwasyon ang mga mamumuo, mag-uuma, semi-proletaryado ug uban pang nilupigang

hut-ong ug sektor nga maghugpong aron panalipdan ang ilang mga panginabuhian ug mga demokratikong katungod, ug ipunting ang ilang kasilag ug protesta sa rehimeng Marcos, sa imperyalismong US ug mga pasistang gaway niini.

Sa mga pabrika, eskwelahan, sa mga baryo, sa lain-laing lungsod ug prubinsya, ilhon ang hinanaling mga problema ug panawagan sa masa. Tukuron dinhi ang solidong kusog sa masa sa porma sa mga unyon ug mga kahugpungan, ug ipataas ang ilang kahimatngon. Magmartsa o magrali aron ipakita ang lapad nilang panaghiusa ug palanugon ang ilang mga singgit. Pakusgon o tukuron ang mga sanga sa Partido ug mga tago nga rebolusyonaryong organisasyong masa aron magsilbing puthaw nga dugukan sa lapad nga masa. Giyahan sila sa ilang mga pakigbisog ug ipataas kini sa pagbatok sa nagharing rehimeng Marcos.

Kinahanglang manglimbasog sa pagpakusog ug pagpalapad sa Bagong Hukbong Bayan (BHB) isip armas sa katawhan aron hingpit nga tapuson ang sistemang nangdaugdaug ug nagpahimulos kanila. Rekruton ang pinakadaghang mamumuo, mag-uuma, semi-proletaryado, mangingisda, mga petiburges nga intelektwal aron magsilbing mga Pulang manggugubat ug mga kumander sa Bagong Hukbong Bayan.

Atubangan sa todong kabangis ug brutalidad sa nagharing rehimen, lig-on ang baruganan sa BHB nga depensahan ang kaayuhan ug katungod sa masa, ug ang ilang makatarunganon ug malungtarong pangayo ug interes. Wala nalingla ni Marcos ang mga rebolusyonaryong pwersa bisan og magsuot kini og maskarang "kalinaw" aron itago ang pasistang bangkil. Hugot nga gihuptan sa mga Pulang manggugubat ang ilang mga armas. Andam silang mosukol alang sa katawhan hangtud sa ulahing gutlo sa ilang kinabuhi. Determinado silang ias-dang ang gubat sa katawhan hangtud sa kadaugan.

 Bolyum LVI Ihap 11 Hunyo 7, 2025	
Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.	
Unod Editorial: Pakusgon ang mga pakigbisog batok sa paantus ug traydor nag rehimeng Marcos 1 Ika-4 nga teoretikanhong kumperensya sa NDFP 3 Pagkigbisog sa mamumuo, drayber ug kabus 4 Pagpanghasi sa militar sa mga komunidad 5 OP-OD, gilunsad 5 Pagsumpo sa rehimeng Trump sa mga imigrante 6 Mga protesta 6 Sa mubong pagkasulti 7 Pribatisasyon sa CBK Hydroelectric Plant 8 3 war games sa US sa Pilipinas, gilunsad 8 Ka Basavaraju, bayani sa rebolusyong Indian 9 Operation Gideon's Chariot ng Israel sa Palestine 10	
Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas	
 ang.bayan@cpp.ph	

Teoretikanhong kumperensya mahitungod sa kumprador ug burukratang kapitalismo

Nagtigum sa Nairobi, Kenya sa Africa niadtong Mayo 23-24 ang 110 ka indibidwal nga mirepresentar sa 28 ka partido proletaryo-sosyalista, pormasyong anti-imperyalista, mga organisasyon sa panukiduki, ug progresibong kalihukan sa katawhan gikan sa 20 ka nasud sa lima ka kontinente alang sa usa ka teoretikanhong kumperensya. Sa pagpasiugda sa National Democratic Front of the Philippines (NDFP) ug sa Communist Party Marxist Kenya (CPMK), malampuson ang kumperensya nga nagtuki sa kumprador ug burukratang kapitalismo sa mga neokolonya.

Ang kumperensya, nga ginganlan og Internasyunal nga Teoretikanhong Kumperensya Mahitungod sa Kumprador ug Burukratang Kapitalismo sa mga Neokolonya, mao ang ika-upat sa serye sa mga kumperensyang gipasiugdahan sa NDFP nga nagtuki sa mga mahinungdanong isyu sa teorya. Kini ang unang kumperensya nga gihimo sa Africa. Gihisgutan sa kumperensya ang 21 ka artikulo nga gisulat sa mga komunista ug proletaryo-sosyalistang partido, ug mga anti-imperyalistang organisasyon nga nangulo sa malingkawasnong kalihukan sa Congo, Cyprus, Guatemala, Indonesia, Iraq, Ireland, Kenya, Kurdistan, Nepal, Pakistan, Palestine, Pilipinas, Sudan, South Sudan, Turkey, Uganda, ug Zambia.

Ang duha ka adlaw nga kumperensya nagsilbing higayon alang sa pagpresentar sa Marxista-Leninistang pagsusi sa nagtunhay nga moda sa produksyon sa lain-laing mga nasud. Partikular nga gisusi dinhi ang historikal nga paglambo sa mga neokolonyal nga katilingban ubos sa kontrol sa imperyalismo.

Gitun-an sa mga delegado sa kumperensya ang materyal nga ugat sa burukratang kapitalismo ug kapitalismong kumprador, base sa mga sinulat ni Lenin ug Mao bahin sa semikolonyal ug semipyudal nga paghari, ingonman ang mga plano ug lakang sa imperyalismong US aron mapabilin ang kontrol sa mga neokolonya.

Gisusi usab ang papel sa lain-laing hutong sa mga neokolonya isip lokal nga mga

ahente sa pagpangawkaw sa ekonomiya, ug pagsunod sa pulitika ug militar alang sa interes sa imperyalismo. Misalmot ang mga delegado sa lalum nga diskusyon aron mapalalum ug mapalapad ang pagsabot sa mga kondisyon nga naghimugso sa mga katilingbanong istruktura sa semikolonyal ug semipyudal sa tagsa-tagsa nilang mga nasud.

Gihisgutan usab ang mga praktikal nga isyu nga may kalabutan sa rebolusyonaryong kalihukan ug pagpalambo sa mga kalihukang masa, ilabina sa konteksto sa burukratang kapitalismo. Gisusi sa mga partisipante ang mga estratehiya sa pagorganisa sa mga partikular nga hutong sa katilingban, sama sa semiproletaryado, ug gi-analisa kung giunsa paghulma sa nagkagrabeng krisis sa kalibutan ug nagkalalum nga imperyalistang agresyon ang pag-uswag sa mga pwersang rebolusyonaryo, ug sa mas lapad nga kalihukang Walhon sa ilang mga nasud ug rehiyon.

Ang artikulo nga gipaambit gikan sa Pilipinas gisulat sa Komite Sentral sa Partido Komunista ng Pilipinas. Gisubay sa artikulo ang kasaysayan sa pagtumaw sa kumprador ug burukratang kapitalismo sa nasud nga resulta sa paghari sa im-



peryalismong US pinaagi sa mga ahente niini sa ekonomiya ug pulitika. Gipatin-aw usab niini ang papel sa kumprador ug burukratang kapitalista aron ipabilin ang semikolonyal ug semipyudal nga katilingbang Pilipino.

Sa pagtapos sa kumperensya, nagpadayag ang mga delegado og pakighiusa sa gipahigayon nga African Liberation Day niadtong Mayo 25 isip paghinumdom sa pagtukod sa Organization of African Unity, nga nahimong African Union. Gitukod ang OAU aron iasdag ang panaghiusa ug kooperasyon sa mga anti-kolonyal nga mga malingkawasnong kalihukan ug pagtunhay sa bag-ong mga independyenteng guberno sa 30 ka mga nasud sa Africa niadtong 1960s.

Gitan-aw nila kini nga kabahin sa komun nga pakigbisog sa mga gipanglutos nga katawhan batok sa imperyalismo ug tanang reaksyunaryo. Gipanghimatuud sa kumperensya ang pakighiusa sa mga pwersang anti-imperyalista ug proletaryo-sosyalista sa nagpadayon nga kamahinungdanon sa mga malingkawasnong kalihukan sa Africa nga kabahin sa mas halapad nga mga pakigbisog alang sa kaugalingong paghukom ug sosyalismo.

Pakigbisog sa mga mamumuo, drayber ug kabus alang sa panginabuhi ug puy-anan

Atubangan sa nagkagrabe nga krisis sa ekonomiya ug lapad nga pagkaguba sa panginabuhi sa masang anakpawis, padayon nga mibarog ang mga mamumuo ug kabus-sa-kasyudaran. Misukol sila pinaagi sa paglunsad og mga piket, welga, hunong-pasada ug barikadang bayan.

Welga sa Kawasaki. Nagwelga ang 140 ka mamumuo sa Kawasaki Motors Phils. Corporation (KMPC) sa pagpanguna sa Kawasaki United Labor Union niadtong Mayo 21 tungod sa pagka-delatar sa negosasyon sa *collective bargaining agreement* (CBA) tali sa *management* ug unyon. Nakamuntar ang piketlayn sa unyon atubangan sa hedkwarters sa kumpanya sa Muntinlupa City. Nanawagan sila og makabuhi nga suhulan, makatarunganong mga benepisyo ug pag-ila sa katungod sa mga mamumuo.

Pakigbisog sa mga drayber sa Lucena City. Halos duha ka bulan nga nagwelga ang mga drayber ug mga trabahante sa FOC Transportation Corporation sa terminal niini sa Barangay Comon, Infanta, Quezon. Ang mga bus nagabyahe sa rutang Infanta-Lucena City. Gikasa ang welga tungod sa paghikaw sa makatarunganong *separation pay* ug sa wala pag-atubang sa kumpanya sa negosasyon. Imbis nga tubagon ang mga reklamo sa mga trabahante, gipasakahan na hinuon sa kumpanya og kasong *grave coercion* ug *illegal strike* ang mga trabahante ug mga organisador sa pederasyon sa unyon.

₱1,200 nga makabuhing suhulan. Nagpiket ang mga mamumuo gikan sa National Capital Region (NCR) sa pagpanguna sa Unity for Wage Increase Now sa Regional Tripartite Wages and Productivity Board-NCR dungan ang pagsumite og petisyon alang sa ₱1,200 nga makabuhi nga suhulan niadtong Mayo 22. Giatol nila ang aksyon ug

pagsumite sa gipatawag nga konsultasyon sa sweldo sa RTWPB NCR.

Niadtong Hunyo 2, nagpiket ang mga mamumuo atubangan sa Kongreso aron iduso ang pag-aproba sa sugyot balaudnon nga ₱200 nga dugang sweldo para sa tanang mamumuo sa tibuok nasud. Duha ka adlaw human niini, giaprubahan sa Kongreso ang maong balaudnon sa ikatulong pagbasa. Matud nila, bisan og layo pa gihapon ang dugang nga ₱200 gikan sa ₱1,200 nga makabuhi nga suhulan, kinahanglan kining maaprubahan ug pirmahan dayon ni Ferdinand Marcos Jr.

NCAP ug jeepney phaseout, ipabasura. Niadtong Hunyo 2, nagkaraban ang Stop NCAP Coalition sa mga mayor nga kalsada sa Metro Manila ug nagtapok sa atubangan sa upisina sa MMDA sa ED-SA-Ortigas aron ipabasura ang No-Contact Apprehension Policy (NCAP). Sumala sa koalisyon, ang NCAP ilegal, kontra-kabus, ug wala miagi sa hustong proseso. Gi-question na usab kini sa mga eksperto sa balaod ug grupo sa tawhanong katungod, ilabina sa konstitusyonality ug proseso niini.



Naghunong-pasada ug nagprotesta ang mga drayber ug opereytor sa dyip sa Panay ug Negros aron ipabasura ang Public Transportation Modernization Program (PTMP) ug Local Public Transport Route Plan (LPTRP) niadtong Hunyo 5 ug Mayo 30. Kabahin kini sa 'semana sa protesta' nga gilunsad sa Piston gikan Hunyo 2 hangtud Hunyo 6.

Barikada sa Mayhaligue, Tondo. Napakyas sa panaghiusa ug barikada sa mga residente sa Mayhaligue Street sa Barangay 262 ug 264 sa Zone 24, Tondo, Manila ang demolisyon nga gipahigayon sa mga pwersa sa estado niadtong Mayo 26. Upat ang iligal nga giaresto sa komprontasyon. Kapin sa 400 ka pamilya o halos 2,000 ka indibidwal ang mawagtangan og balay tungod sa plano nga demolisyon ug pagpang-angkon sa kumpanyang 2288 Ethan Realty Corporation. Temporaryong gipahunong sa usa ka korte sa Maynila ang demolisyon human paboran ang petisyon para sa temporary restraining order (TRO) niadtong Mayo 27.

Demolisyon sa Davao City. Dili moubos sa 400 ka pamilya ang napalayas sa demolisyon nga gihimo sa 500-ka tawong pwersa nga naglakip sa 300 ka pulis sa Upper Arroyo, Barangay Matina Crossing, Davao City niadtong Mayo 23. Mikabat sa 80 ka balay sa gidemolis diin naapektuhan ang 60 ka tigulang ug dili moubos sa 200 ka mga bata. Usa ka kamandoan sa korte ang gigamit aron ipatuman ang demolisyon apan alang ra kini sa pito ka balay sa maong distrito. Temporaryong napahunong ang demolisyon pinaagi sa TRO nga nakuha sa mga residente niadtong Mayo 24.

Pangpanghasi sa militar sa mga komunidad, makamatay sa mga sibilyan

Duha ka sibilyan sa Negros ang nataho nga namatay tungod sa pagpanghasi sa militar sa ilang mga komunidad niadtong Mayo. Samtang padayon ang pagpangabuso sa mga sundalo sa Albay, Masbate, Bohol ug Metro Manila.

Sa Negros Occidental, nataho nga namatay si Nay Lolita Reman sa Sityo Toril, Barangay Bandila, Toboso niadtong Mayo 20, tungod sa grabeng kahadlok ug troma sa mga operasyon sa 79th Infantry Battalion (IB) sa lugar. Gireyd ug giransak sa mga sundalo sa 79th IB ang balay sa pamilya Mahusay diin nagpuyo si Nanay.

Susama nga insidente ang nahitabo sa Barangay Minapasok, Calatrava. Na-stroke si Boyet de Asis, usa ka mag-uuma, niadtong Mayo 23 tungod sa mga hulga gikan sa pito ka sundalo sa 79th IB ug mga traydor nga sila Marlon Basalo (Elan) ug alyas Jonel/Mike sa Sityo Kapanuya.

Niadtong Mayo 31, gipugos pagsulod ug giransak sa mga sundalo sa 79th IB ang balay sa magtiayon nga si Alejandro ug Maricel Villamero sa Sityo Manaysay, Barangay Cambayobo, Calatrava. Gikawat sa mga sundalo ang kapin sa ₱7,000 nga dugay nang tinigum nga kwarta sa magtiayon.

Sa Masbate, gipailalum sa grabeng interogasyon sa mga sundalo sa 96th MICO ang 12 ka sibilyan gikan sa Uson, Masbate sa katapusang semana sa Mayo. Gipugos silang gipaangkon nga aduna silay kalambigitan sa Bagong Hukbong Bayan (BHB). Misamot ang sakit sa usa sa mga biktima human sa interogasyon ug naglisod kini og istorya tungod sa stroke ug diabetes nga resulta sa kahadlok ug troma.

Sa Negros Oriental, giadtoan sa mga sundalo ang balay sa mag-uuma nga si Alan Garde sa Barangay Sandayao, Guihulngan City niadtong Mayo 15. Gipugos si Garde nga mo-angkon nga adunay kalambigitan ug nagasuporta sa BHB. Sa samang adlaw, gisulod ug giransak sa mga sundalo ang balay ni Rocky Fat. Gipagawas sa mga sundalo nga nakakumpiska sila og armas gikan kaniya ug gisulayan siya pagdakop apan mibarog ang iyang pamilya batok niini.

Sugod Mayo 3, gipailalum sa 83rd

IB sa daw balaod militar nga paghari ang tulo ka barangay sa Caramoan, Camarines Sur. Giharass, gipanghulga ug giakusahan ang mga residente, partikular ang unum ka indibidwal nga mga paryente o mga tagasuporta sa BHB. Ang uban sa mga biktima gipugos sa militar nga ipagawas ug "isurender" ang ilang mga bana nga giakusahanang Pulang manggugubat. Daghang higayon nga gipugos pagsulod ang mga balay sa mga residente ug iligal nga gikuhaan og litrato sa mga sundalo.

Sa Northern Samar, gipailalum sa hamlet sa AFP ang mga barangay sa Catubig, Las Navas, Gamay, Mapanas ug Palapag sugod Hunyo 4. Gipahamtang kini human sa giingong engkwentro sa AFP ug BHB niadtong adlaw sa Barangay Nagoocan, Catubig. Gibawalan ang mga residente nga moadto bisan pa sa ilang uma, silingang baryo, o sa lungsod. Sa wala pa kini, kaylap ang pagpamugos sa militar sa mga residente sa lungsod sa Palapag nga "pasurenderon" ang ilang mga paryente nga giakusahan nga manggugubat sa BHB.

Pag-aresto ug pagsang-at og gamagamang kaso. Gi-aresto si "Ruben," 47 anyos, usa ka trabahante sa konstruksyon ug residente sa Barangay Namantao, Daraga, Albay, sa kasong *illegal possession of firearms and explosives* ug giakusahan nga myembro sa BHB. Gidagit siya sa mga elemento sa 31st IB sa iyang balay niadtong Mayo 23 ug gidala sa usa ka bakanteng balay. Nagpabuto og pusil ang mga sundalo aron ipagawas nga adunay engkwentro.

Sa Bohol, nagpakaylap og pekeng balita ug impormasyon ang CIDG niadtong Mayo 23 batok kang Carmilo Tabada, konsehal sa usa ka barangay sa Trinidad. Giakusahan siyang upisyal sa pinansya sa PKP ug giingong gi-aresto tungod sa kasong "terrorism financing." Gipatin-aw ni Tabada nga siya mismo ang mitungha sa korte ug nagpyansa bahin sa kaso. AB

OP-OD, gilunsad sa mga grupong rebolusyonaryo

PIPILA KA ADLAW ayha ug human sa reaksyunaryong eleksyon niadtong Mayo 12, naglunsad og operasyon pinta-operasyon dikit (OP-OD) ang lain-laing organisasyong kaalyado sa National Democratic Front (NDF) aron ibutyag ang pagkadunot niini. Nag-unang mensahe sa mga OP-OD mao nga ang rebolusyon ang tinuod nga solusyon nga magdala sa tinuod nga katingbanong kausaban sa nasud, dili ang reaksyunaryong eleksyon.

Tataw kaayo ang elektronikong pagpanikas ug uban pang matang sa anomalya aron paboran ang mga representante sa mga agalong yutaan, burgesyang kumprador, ug sa imperyalistang US. Labaw pang nabutyag sa bagong eleksyon ang pagkabangkrote ug pagkamini sa maong "demokratikong proseso."

Nanawagan sila sa katawhan nga moadto sa kabanikanhan, mosampa sa Bagong Hukbong Bayan (BHB) ug iaslang ang gubat sa katawhan.

Gipasiugdahan ang mga aktibidad sa Kabataang Makabayan, Artista at Manunulat ng Sambayanan, Liga ng Agham para sa Bayan, Katipunan ng mga Samahang Manggagawa, ug panrehiyong balangay sa NDF. Gihimo nila kini sa Polytechnic University of the Philippines-Sta. Mesa, University of the Philippines (UP)-Los Baños, UP Manila, sa mga kalsada sa Manila, Baguio City, Rizal, ug Quezon.

Pag-antus sa mga Pilipino sa pagsumpo sa mga imigrante sa rehimeng ni Trump

SUKAD NGA SUBLING nakalingkod si Donald Trump isip presidente sa US niadtong Enero, walay hunong ang malukpanong pag-atake, pagpanumpo, pugas ug arbitraryong pagpalayas o deportasyon sa mga mamumuong imigrante sa US. Gikan Enero hangtud Mayo, kapin 271,000 na ka mga imigrante ang gipadeport sa administrasyon samtang dili moubos sa 49,184 ang kasamtangang nakadetine sa nagkalainlaing pasilidad sa Immigration and Customs Enforcement (ICE) sa US.

Sumala sa embahada sa Pilipinas ug base sa mga kasong gihuptan sa Tanggol Migrante, gibanabana nga dili moubos sa 30 ka Pilipinong imigrante ang nareport nga napadeport karong tuiga. Dili makuha ang eksaktong ihap sa mga nakadetine o napadeport sa ICE tungod kay wala kini nagpagawas og impormasyon.

Mokabat sa 150,000 hangtud 370,000 ka Pilipino nga walay dokumento o iligal nga nagpuyo sa US.

Sumala sa Bayan USA, kulang ang gibuhat nga aksyon sa embahada sa Pilipinas sa US ug sa mga konsulado niini alang sa mga Pilipinong imigranteng nakabilanggo ug nakatakhang ipapauli. Grabe ang ilang pagpasagad ug kawalay pagtagad sa mga Pilipinong imigrante nga nanginahanglan og tabang. Bisan ang ayuda gikan sa Assistance to the Nationals Fund sa embahada gihikaw sa mga nanginahanglan.

Atubangan sa pagpasagad sa rehimeng US-Marcos, padayon ang kampanya ug pag-organisa sa mga organisasyon sa US nga gipangulohan sa Tanggol Migrante, mga alyadong grupo, ug mga Pilipino sa komunidad. Naglunsad sila og lain-laing aktibidad sama sa *press conference*, rali, pagbisita sa mga nakadetine, pagpanghatag og sulat sa mga korte, ug pagpangalap og donasyon alang sa hinanaling pagpagawas sa mga gidetine ug pagtabang sa ilang mga pamilya.

Tungod sa hiniusang paglihok sa mga katawhan sa US, napagawas nila si Michelle (dili tinuod nga ngalan) niadtong Abril 30 ug si Lewelyn Dixon niadtong Mayo 29, parehong gidetine sa NorthWest ICE Detention Center (NWDC) sa Tacoma, Washington.

Padayon nga nakadetine karon sila Maximo Londerio, Rodante Rivera, Ligaya Jensen, ug Alma Bowman, mga residente sa US nga dugay nang nagpuyo dinhi.

Nanawagan usab ang mga demokratikong organisasyon sa US og hinanaling aksyon gikan sa guberno sa Pilipinas. Matud nila, kinahanglan hatagan og igong suporta ang tanang imigrante, lakip na ang mga nag-atubang og deportasyon, *trafficking*, o pagpangawat sa sweldo. Nanawagan usab sila kang Ambasadador Jose Manuel Romualdez nga moluwat na sa iyang posisyon kung dili niya kaya ang pagpanalipud sa mga Pilipino sa US.



Taralon si Sara Duterte. Nagprotesta sa Senado sa Pasay City ang mga progresibong grupo niadtong Hunyo 3 aron manawagan nga sugdan na ang dugay nang gilangan nga pagtaral sa kaso sa *impeachment* ni Vice President Sara Duterte. Gimakmak nila ang paglangan pinaagi sa daghang palusot sa Senado aron mapugngan ang pagsugod niini. Niadtong Pebrero pa gisumite sa House of Representatives ang mga artikulo sa *impeachment*.

Daghan na usab ang nagmakmak sa Senado tungod sa paglapas niini bisan sa 1987 Konstitusyon tungod sa paglanganlangan sa pagtaral. Lakip na dinhi ang mga propesor sa University of the Philippines College of Law. Samtang nagkatakdang maglunsad ang lain-laing grupo og lapad nga protesta sa Hunyo 11, adlaw sa pagdungog sa Senado sa *impeachment*, nga gipangulohan sa Taumbayan Ayaw sa Magnanakaw at Abusado Network Alliance (TAMA NA).

Sukol, mangingisda. Naglunsad og *fluvial parade* o parada sa mga bangka ang Pamalakaya ug Save Laguna Lake Movement sa Muntinlupa City niadtong Mayo 31, nasudnong adlaw sa mga mangingisda, aron ipanawagan ang pagbasura sa makadaut nga Laguna Lake Roadshore Network Project ug 2,000-ektaryang *floating solar power project* sa Laguna de Bay.

Niadtong Mayo 30, nagmartsa ang gatusan ka mga mangingisda, mga tigsuporta ug mga tigpanalipud sa kinaiyahan padulong sa Mendiola sa Manila. Nanawagan sila sa pagpanalipud sa katungod sa mga mangingisda, pagsupak sa reklamasyon, ug pagbawi sa desisyon sa Korte Suprema bahin sa 15-kilometrong *municipal waters*.

Hustisya para kang Junver. Nag-ogbok og mga kandi-la ang mga estudyante sa University of Santo Tomas sa ilang kampus sa Manila niadtong Mayo 29 isip panawagan sa hustisya sa pagkamatay ni Junver Toledo, 22. Nataho nga nagpakamatay si Toledo, usa ka estudyante sa UST College of Rehabilitation Sciences niadtong Mayo 17 tungod sa presyur sa pag-eskwela.

Buhian ang mga bilanggong pulitikal. Naglunsad og piket-protesta ang Karapatan-National Capital Region atubangan sa Quezon City Hall of Justice niadtong Mayo 20. Panawagan nila nga hinanaling buhian ug ibasura ang mga kaso sa *illegal possession of firearms and explosives* batok sa mga unyonista nga sila Mark Ryan Cruz, Romina Astudillo, ug Jaymie Gregorio, nga kabahin sa Human Rights Day 7. Nakatakda ang pagdungog niadtong adlaw apan wala motungha ang tigtaral tungod kay “nagbakasyon” maong giusab ang iskedyl sa pagdungog ngadto sa Agosto.

71 sa 82

prubinsya nagpabiling kontrolado sa mga **dinastiya sa pulitika** human ang 2025 eleksyon, sama lang sa wala pa ang eleksyon.

3 ka kalihim

lamang ang **gitangtang ni Marcos Jr** sa iyang gabinete human ang pasundayag nga pagpaluwat niya sa tibuok gabinete aron tubagon kuno ang mulo sa katawhan sa kausaban.



lab-as nga isda ang gitugutang i-import sa rason nga sarado sulod sa 3 ka bulan gikan Hunyo 1 ang *fishing season* sa **Davao Gulf** ug ubang pangisdaanan.



o hangtud ₱600M/bulan ang nalugi sa mga negosyo sa **Tacloban City** samtang gipahamtang ang mga restriksyon sa pagbyahe sa dagkung trak sa **San Juanico Bridge**.



911

ang kumpirmadong kaso sa MPox (**monkeypox**) sa Pilipinas gikan 2024 hangtud Hunyo 4, 2025. Dili kini mokaylap sa hangin sama sa Covid-19 kundili pinaagi sa pagdikit sa lawas sa usa ka tawong natakdan niini, o sa mga gamit nga kontaminado.



1-10

sa pinakadaku og sweldo sa gubyrno niadtong 2024 pulos upisyal sa **Bangko Sentral ng Pilipinas**; pinakadakug sweldo ang nangulo niini nga si Eli Remolona nga mokabat og ₱47.96M kada tuig.

57/adlaw

bag-ong kaso sa **HIV** sa Pilipinas niadtong Enero-Marso 2025, mas taas sa 50% sa parehong mga bulan niadtong 2024. **Pinakadaghan sa mga kaso nag-edad og 15-25.**



70%

mas taas ang ihap sa mga kaso sa **krimen** nga gikalambigitan sa mga **sundalong Amerikano** sa **South Korea** niadtong 2023 kumpara niadtong 2018.

Gikan sa: 2024 Justice Yearbook, Ministry of Justice, South Korea



Pribatisasyon sa CBK Hydroelectric Plant, gikundena

Hugot nga gimakmak ni Atty. Carlos Zarate, kanhi representante sa Bayan Muna, ang plano sa rehimen US-Marcos nga himuong pribado ang Caliraya-Botocan-Kalayaan (CBK) *complex*. Matud niya, magresulta lamang kini sa mas mahal nga singil sa kuryente nga dugang nga paantus sa katawhang nagsalig sa serbisyo.

“Ang gubyrerno dapat adunay kontrol sa mga nag-unang serbisyo sama sa kuryente. Imbis nga ibaligya ang CBK, angay kini himuong modelo sa *renewable energy* aron mapakunhod ang singil sa kuryente para sa tanan,” dugang pa ni Zarate.

Nakatakda ang pribatisasyon sa CBK *complex* sa katapusan sa Hunyo karong tuiga. Sumala sa Department of Finance (DOF), posibleng makaginansya ang gubyrerno og ₱50 bilyon (\$897.99 milyon) hangtud ₱100 bilyon gikan sa pagsapribado sa pasilidad.

Ang 728 megawatt (MW) nga CBK *hydropower complex* mao ang nag-inusarang nagaandar nga *hydroelectric facility* nga pagpanag-iyang sa Pilipinas. Kini usab ang labing karaang *hydropower plant* sa nasud.

Gilangkuban ang CBK *complex* sa Botocan *hydro electric power plant* (HEPP) nga gitukod niadtong 1939 nga adunay kapasidad nga 20.8 MW, sa Caliraya HEPP nga gitukod niadtong 1942 nga adunay kapasidad nga 22MW, ug sa Kalayaan *pump storage power plant* nga gitukod niadtong 1983. Nahimutang ang mga planta sa mga barangay sa Kalayaan, Lumban ug Majajjay sa Laguna.

Ang *complex* unang gipauswag ubos sa National Power Corporation (NAPOCOR). Niadtong Pebrero 7, 2001, upisyal nga gidumalahan sa CBK Power Company Limited ang CBK *complex* ubos sa Built-Rehabilitate-Operate-Transfer *scheme* sa gubyrerno sa Pilipinas pinaagi sa NAPOCOR nga matapos pagkahuman sa 25 ka tuig.

Niadtong Abril 2005, nakuha gikan sa orihinal nga tag-iyang ang CBK BROT Agreement sa duha ka Japanese nga kumpanya—ang Electric Power Development Co., Ltd (J-Power) ug Sumitomo Corporation. Mahuman ang kontrata niini sa Pebrero 2026.

Ang CBK *complex* usa sa tulo ka dagkung planta sa kuryente nga nagpabilin nga gipanag-iyahan sa gubyrerno. Gipailalum kini sa Power Sector Assets and Liabilities Management Corporation (PSALM) alang sa pribatisasyon sa mga pasilidad. Ang duha pa nga nakatakhang ibaligya mao ang 932MW Agus-Pulangui *hydropower complex* sa Mindanao grid; ug ang 210MW Mindanao *coal plant*. AB

3 war games, dungan nga gilunsad sa US sa Pilipinas

DAYAG NGA PAGYATAK sa soberanya sa Pilipinas ang presensya sa liboan ka sundalong Amerikano, Australiano ug uban pang langyawng tropa sa teritoryo sa nasud alang sa mga mahagiton ug dagkung *war games*. Sukad Mayo, tulo dinhi ang dungan nga gipahigayon sa US, ang usa gilunsad sa hukbo sa Australia. Kini mao ang Kamandag (Mayo 26–Hunyo 6), Kasangga (Mayo 19–Hunyo 24) ug Salaknib 2025 Phase 2 (Mayo 19–Hulyo 20).

Gipahigayon ang Kamandag sa Batanes; sa Capas, Tarlac diin gihimo ang *live-fire drills*; ug sa Burgos, Ilocos Norte diin gipahigayon ang usa ka *maritime strike operation*. Aduna usab mga aktibidad sa Palawan ug sa ubang bahin sa Luzon ug sa Tawi-tawi sa Mindanao.

Gigamit sa mga tropa sa US ug Pilipinas ang Navy-Marine Expeditionary Ship Interdiction System (NME-SIS) ug High Mobility Artillery Rocket System o HIMARS sa Kamandag. Ang NMESIS usa ka sistema sa *missile* nga *anti-ship* o pangpabusikad sa barko. Gikaraga kini sa usa ka *unmanned ground vehicle* (dakung trak) nga gitawag og ROGUE Fires Carrier ug adunay dala nga Naval Strike Missile (NSM).

Lakip sa *war games* ang 2,031 ka sundalo sa US Marine Corps ug 2,028 ka pwersa gikan sa Pilipinas. Aduna usab mga sundalo gikan sa South Korea, Japan ug United Kingdom nga nag-apil sa *war games*. Ang mga tropa gikan sa France, Canada, Bahrain, Australia, Indonesia, Thailand ug Netherlands nagsilbing mga “obserber.”

Ang Kasangga gisugdan sa kampo sa 4th ID sa Cagayan de Oro City ug gihimo sa Camp Kibaritan, Kalilangan, Bukidnon. Dili moubos sa 90 ka sundalo gikan sa Australian Army ug 140 ka sundalo sa Philippine Army ang apil sa *war games*. Magpadayon kini hangtud Hunyo 24.

Samtang ang Salaknib sa US ug Pilipinas kasamtangang gipahigayon sa Northern Luzon.

Kini nga mga *war games* gipahigayon sa nasud aron mapalig-on sa US ang kontrol niini sa AFP, sumala sa Partido Komunista ng Pilipinas (PKP).

“Supak ang katawhang Pilipino sa maong mga *war games*. Dugang sa dala niining peligro sa mga Pilipino, dangan pa kini sa mga residente nga nahikawan sa ilang panginabuhi aron hatagan og dalan ang mga pagbansay,” matud pa ni Marco Valbuena, nangulong upisyal sa impormasyon sa PKP.

Ang dinaghan ug subsub nga *war games* ug ang pagpakaitoy sa AFP ug sa rehimen ni Marcos mao ang hinungdan nganong giila sa daghang nasud sa Asia ang Pilipinas isip *proxy* sa US, dugang pa sa PKP. Dili buta ang mga kasikbit nga nasud sa Asia sa pagsunod ni Marcos ug sa iyang mga heneral sa direksyon ug plano sa US.

Kaubang Basavaraju, bayani sa rebolusyong Indian ug proletaryo sa tibuok kalibutan

Gipasidungan ang Partido Komunista ng Pilipinas (PKP) si Kaubang Basavaraju (Nambala Keshava Rao), pangkinatibuk-ang kalihim sa Communist Party of India (Maoist), nga namartir uban sa 27 pa ka mga kauban niadtong Mayo 21. Gipatay sila sa mga pwersa sa estado sa India sa gitawag nga Masaker sa Gundekote, sa Abhujmad sa distrito sa Narayanpur sa Chhattisgarh, India.

Naggilak karon ang ngalan ni Kaubang Basavaraju sa han-ay sa mga imortal nga bayani sa epikong gubat sa katawhan sa India ug sa mga rebolusyonaryong pakigbisog alang sa nasudnong kagawasan ug sosyalismo sa tibuok kalibutan. Gidala niya ang sulo sa armadong pakigbisog sa India ug nagsilbing iwag sa dalan sa tibuok kalibutan nga rebolusyong proletaryo, ilabina sa mga milabayng dekada sa mga kapakyasan ug pagkapildi sa mga pwersang sosyalista sa lain-laing bahin sa kalibutan.

Kinsa si Kaubang Basavaraju?

Natawo si Kaubang Basavaraju niadtong 1955 sa usa ka pamilya sa mga mag-uuma sa komunidad sa Jiyannapetta sa distrito sa Srikakulam, Andhra Pradesh nga nahimutang sa habagatang-sidlakang bahin sa India. Nag-eskwela siya sa elementarya ug hayskul sa ilang distrito ug miadto sa syudad sa Warangal sa silingang estado sa Telangana aron mag-eskwela og engineering sa kolehiyo.

Samtang naa sa kolehiyo, nahigmata siya sa kahimtang ug pakigbisog sa katawhang Indian, hinungdan nga misalmot siya sa kalihukang estudyante. Niadtong dekada 1980, nahimong kabahin siya ug miako og yaweng katungdanan sa CPI (Marxist-Leninist) People's War. Nahimong myembro siya sa sentral nga komite sa partido niadtong 1992.

Niadtong 2004, usa siya sa nanguna sa paghiusa sa CPI (ML) People's War ug sa Maoist Communist Centre of India (MCCI) aron tukuron ang CPI (Maoist). Usa siya sa


mga nagtukod sa People's Liberation Guerilla Army (PLGA), ang hukbong bayan sa India, niadtong 2000. Gipangulohan niya kini sulod sa taas nga panahon ug nanguna sa daghang kalampusan sa pagtukod sa mga rebolusyonaryong base ug pagpasiugda sa mga taktikal nga open-siba batok sa mga pwersang pasista.

Nagsilbi siya isip myembro sa Komite Sentral sulod sa 33 ka tuig ug sa Politburo sulod sa 25 ka tuig. Gipangulohan niya sulod sa taas nga panahon ang Sentral nga Komisyong Militar sa CPI (Maoist). Niadtong katapusang bahin sa 2018, gipili siya sa Komite Sentral isip pangkinatibuk-ang kalihim sa CPI (Maoist) ug mipuli sa liderato ni Kaubang Ganapathy.

Panawagan alang sa hustisya

Hustisya ang nagkahiusang singgit sa katawhang Indian ug sa mga internasyunal nga partido ug organisasyon sa pagpatay kang Kaubang Basavaraju ug sa 27 pa ka mga kauban. Nataho sa Masaker sa Gundekote ang mga paglapas sa internasyunal nga balaod sa tawhanong katungod ug mga lagda sa gubat.

Sumala sa report sa Dandakaranya Special Zonal Committee sa CPI (Maoist), ang 27 ka mga kauban nga myembro sa CPI (Maoist) ug manggugubat sa PLGA napatay sa pagliyok sa libu-libong militar ug pulis sa reaksyunaryong estado sa ilang kampo. Gipadayag sa komite nga human sa mga pakig-away, nadakpan nga buhi si Kaubang Basavaraju ug tinuyong gipatay sa mga berdugong sundalo sa rehimeng Modi.



Ang brutal nga Masaker sa Gundekote kabahin sa teroristang kampanya nga Operation Kagaar. Gisugdan ang operasyon niadtong Enero 2024 diin gigamit ang libo-libong armadong pwersa sa reaksyunaryong estado, nagtukod og gatusan ka mga detatsment militar ug nagpahigayon og kampanya sa pagpamatay ug terorismo batok sa mga Adivasi, o katutubo sa India.

Karon, gipangusgan sa lain-laing demokratikong organisasyon sa India ang imbestigasyon sa Masaker sa Gundekote. Gitinguha nila nga panubagon ang rehimeng Modi ug ang mga upisyal militar niini sa grabeng mga krimen.

Samtang, gipahayag sa Komite Sentral sa PKP ang hingpit nga pag-salig sa Komite Sentral sa CPI (Maoist) nga makapili dayon sila og usa ka lider nga makapuli kang Kaubang Basavaraju aron akuon ang iyang mga responsibilidad. Sumala sa liderato, kumpiyansa sila nga pinaagi sa panaghiusa sa kaalam sa mga tigulang nga kadre ug sa kusog ug kaalam sa mga batan-ong kadre, malabwan sa CPI (Maoist) ang tanang pag-sulay, magpadayon sa dalan sa rebolusyonaryong armadong pakigbisog, ug makakab-ot og daghang kalampusan sa gubat sa katawhan sa India. **AB**

Operation Gideon's Chariots, makamatay nga hampak sa Israel ug US sa minilyong Palestino

Sa unang 24 ka oras sa madugong kampanya nga Operation Gideon's Chariots sa US ug Israel, 144 ka Palestino ang dihadihang napatay sa mga pagpamomba ug atake sa ilang mga tropa sa Gaza. Sa sunod nga mga adlaw, sunod-sunod nga giatake sa pwersang Israeli ang mga bakwitanan ug nabilin nga mga ospital ug eskwelahan aron pugson ang mga Palestino nga moadto sa mga prisohan nga giandam para nila. Gatusan sa mga napatay, mga bata.

Ang Operation Gideon's Chariots, nga gisugdan niadtong Mayo 18, mao ang ulahing hampak sa Israel ug US karon sa 18-ka-bulan nga henosidyo ug 77-ka-tuig nga brutal nga okupasyon sa mga teritoryo sa Palestine. Tumong niini nga direktang sakupon ang tibuok Gaza ug prisohon ang halos 1.5 milyong Palestino sa "sentro sa ebakwasyon" sa habagatang bahin sa engklabo.

Sukad Oktubre 2023, mikabat na sa 63,000 ka Palestino ang direktang gipatay ug 118,300 ang nasamdan tungod sa pagpamomba ug atake sa Israel. Halos katunga sa mga biktima mga bata ug kababayen-an. Gibanabana nga gatusan ka libo pa ang namatay tungod sa kagutom, sakit, ug kakulang sa medikal nga pasilidad. Daghan usab ang natabunan sa mga naguba nga mga biding ug balay, nga wala na makita o nakalot tungod sa walay hunong nga atake sa Israel.

Paggamit sa pagkaon ug ayuda isip armas ug negosyo

Nakaabot na sa ang-ang katalagman ang kagutom sa Gaza ilabina sukad Marso diin hingpit nga gipugngan sa Israel ang pagsulod sa tanang klase sa ayuda. Niadtong Mayo, gihatag niini ang responsibilidad sa pag-apud-apud sa pagkaon sa Gaza Humanitarian Foundation (GHF), usa ka pribadong kumpanya nga gimugna sa US ug Israel aron "pukanon" ang Hamas.

Hugot nga gimakmak sa United Nations ang paggamit sa Israel sa GHF, nga matud niini supak sa

unta pagka neutral, patas ug independyente sa mga makitawhanong gimbuhaton. Gikundena sa UN ug daghang nasud ug internasyunal nga institusyon ang paggamit sa Israel ug US sa ayuda ug pagkaon isip armas batok sa mga sibilyan.

Gawas sa GHF, gipasulod usab sa Israel ang ubang pribadong kumpanyang Amerikano aron molihok isip "pwersang pangseguridad" sa mga sentro sa distribusyon niini. Apil niini ang Safe Reach Solutions, UG Solutions ug S.R.S. Security Firm, nga tanan pagpanag-iy sa mga kanhi heneral sa US Army ug Central Intelligence Agency. Ang pagpili sa mga kumpanya gihimo sa labing taas nga upisyal sa Israel, kauban ang US, nga wala na gipaagi sa ilang tagsa-tagsa ka parlamento ug kongreso.

Padayon nga internasyunal nga mga protesta

Milyun-milyong katawhan sa tibuok kalibutan ang hiniusang nagprotesta batok sa bag-ong hugna sa henosidyo sa Gaza. Panawagan nila ang hinanali ug permanenteng hunong-buto sa Gaza ug pagtapos sa brutal nga pag-atake ug

pagpamomba sa Zionistang Israel. Gipahigayon ang mga protesta isip paghinumdum sa ika-77 ka anibersaryo sa Nakba o Ang Dakung Katalagman, ang unang bangis nga pagpalayas sa mga Zionista sa mga Palestino gikan sa ilang mga yuta aron tukuron sa estado sa Israel.

Gatusan ka mga protesta ang gihimo sa mga syudad sa Middle East, Europe, Asia, Africa ug bisan sulod sa US. Daghang kabatan-onang estudyante sa US ang nangahas sa paglunsad og mga protesta ug diskusyon sa mga unibersidad bisan pa sa grabeng pagpanglutos kanila.

Sa Pilipinas, nakighiusa ang Moro-Christian Peoples Alliance (MCPA) sa kalibutanong panawagan alang sa hinanali ug permanenteng hunong-buto sa Gaza.

Matud ni Amirah Lidasan, kinatibuk-ang kalihim sa MCPA, "sukad nga naputol ang hunong-buto, ang Zionistang Israel ug ang numero uno nga tigpundo niini wala magpakita og kaluoy sa mga igsoong Palestino."

Nanawagan siya sa internasyunal nga komunidad nga ipadayon ang pagpangumbinsi sa ilang mga lider nga buhaton ang aksyon batok sa walay hunong nga pag-atake sa Israel. "Ang kagawasan sa usa mao ang kagawasan sa tanan, ilabina karon nga nag-atubang ta sa grabeng paglapas sa tawhanong katungod, dili kita dapat mohunong hangtud nga dili makab-ot ang kagawasan sa Palestine," matud niya.

Niadtong Mayo 23, nagpahigayon ang grupo og forum ug martsa sa University of the Philippines-Diliman. Giatol kini sa ika-8 ka anibersaryo sa pagpahamtang ni Rodrigo Duterte sa balaod militar sa Mindanao ug pagpulbos sa Marawi City, ang nag-inusarang syudad nga Islam sa nasud, niadtong 2017.^{AB}

